


Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



Prome Minister Eman:

Buskeda pa alternativa pa e area di refineria ta andando

E bishita di Prome Minister mr. Mike Eman na Hulanda tin un obhetivo significativo pa nos comunidad y Eman ta haciendo tur esfuerso pa logra cosnan grandi pa Aruba.

Asina Premier Eman a haci un bishita diabierna cerca Sandor Gastra, Secretaris General di Ministerio di Asunto Economico y Clima na Hulanda.

Prome Minister Eman a comparti e diverso plannan pero tambe ta sondea con por desaroya e tereno di refineria. Tin estudionan intensivo pa haci prome cu haci cuakier movecion riba e tereno di refineria, pero esaki no ta kita afo cu e trabao ta bay ta hopi grandi pa sana e desaroya e area den futuro. Hulanda ta dispuesto pa yuda Aruba mirando cu nan tin e capacidad y varios entidad cu experticio



riba e tereno aki.

Segun Gastra, mirando tur locual ta pasando rond mundo, ta hopi importante pa tin un bon relacion cu tur pais, pero specialmente cu e partnernan den Reino Hulandes.

Recientemente, Parlamentario Mike de Meza, a presenta un mocion den Parlamento den cual a dicidi cu mester dreña un otro epoca pa e area di refineria. Esey ta nifica cu mester sana e area por completo y busca pa desaroya

esaki cu otro actividad comercial economico. E proceso aki no ta facil y ta rekeri hopi experticio y profesionalismo y transparencia. Cu sosten cu a ricibi for di Hulanda pa e proyectonan PPP di Green Corridor y Watty Vos Boulevard, a haya for di Rijkswaterstaat di Hulanda expertonan cu a yuda formula tur detaye di con mester atende cu proyectonan di e embergadura asina.

Banda di Haskoning, cu ta un compania experto cu ta

acesora den e tipo di temanan asina, tecnologicamente ta bisa'bo kico por y ta evalua con ta haci e limpieza di e area. Ademas ta busca sosten riba nivel di legislacion y di organisacion di destahonan publico di e tamaño aki den cual mester garantiza tur transparencia pa haya e miho oferta.

Awe nos ta para dilanti otro oportunidad grandi pa desaroyo nobo pa tanto San Nicolas como pa Aruba completo. E area tin un potencial pa Aruba su economia, si por realiza desaroyo moderno y limpi cu lo trece mas empleo, tanto den e desaroyo nobo como durante e periodo di limpieza.

Kico lo haci den a area no ta difini ainda, pesey ta sondea experticio di Hulanda pa yuda cu e desaroyo di e area grandi aki. Tin hopi oportunidad pa

desaroya un cantidad di actividad comercial economico cu lo trece desaroyo pa San Nicolas y Aruba completo.

Aruba a perde hopi tempo cu contratonan cu companianan cu no tin e capacidad pa maneha nada riba e area ey. No tin tempo mas pa traha cu companianan amateur y p'esey ta necesario pa busca sosten cu companianan di nivel halto.

Ademas di companianan manera Haskoning, PWC, y KPMG y otro entidadnan grandi, Aruba kier tin un capa di "governance" di hendenan cu capacidad cu sa con huridicamente ta hinca tipo di contratonan di destahonan asina grandi den otro pa garantiza un proceso di nivel halto.

Condicion cu trahado di departamento di rijbewijs ta aden ta inaceptabel

Minister di Husticia, Integracion y Transporte Publico mr. drs. Arthur Dowers a haci diferente bishita recientemente na departamento bao su maneho cu mas lihe posibel mester di mantencion urgente.



E mandatario, sorprendi un biaha mas, ta bin topa cu situacion di deterioro na diferente departamento di husti-

cia. Durante su gobernacion anterior a bin haya e mesun situacion cu ta encontra awe, caminda edificio pa falta di

mantencion ta den decadencia total.

Departamento di rijbewijs na Santa Cruz, den un edificio cu a bin haya e tempo aya caba na werki, ta den situacion inhumano pa traha aden y atende cu publico, pa locual ta trata rijbewijs. E tempo ey a traha duro pa soluciona diferente obstaculo, pa awe lamentablemente bin con-

stata cu e trahadonan ta den un condicion cu ta absolutamente inaceptabel. Si acaso no a bin un investigacion ainda, e ta na su luga pa haci esaki.

"Mi mes a dreña e luga y sali cu wowo y nanishi ta kima", ta locual cu Minister a indica despues di su bishita na departamento di rijbewijs na Santa Cruz.

No ta kere cu por accepta pa trahadonan continua mucho largo mas den e condicionnan aki. Hopi lihe mester bin un intervencion pa atende cu salud di trahado, mas ainda cu e mandatario mes a constata e condicion cu nan ta aden. E situacion aki absolutamente no ta aceptabel.

Hende y sostenibilidad tabata un tema central riba Dia Mundial di Turismo

Diabierna, dia 19 di september 2025, Aruba Tourism Authority a organisa "World Tourism Day Conference" na St. Regis Resort Aruba, conmemorando e tema di e añu aki "Turismo y Transformacion Sostenibel".

E evento a trece hunto lidernan, stakeholdernan y expertonan den e industria di turismo pa discusionnan riba e futuro di turismo na Aruba y mas aleu.

Minister di Turismo, Transporte y Labor mr. Wendrick Cicilia a tene un discurso unda a resalta e importancia di hende y sostenibilidad como e impulsornan dobel di e transformacion turistico di Aruba.

"No ta midi turismo solamente den yegada di bishitante of ocupacion di hotel, e ta un realidad door di hende", Minister Cicilia a expresa. El a continua bisando cu: "Nos bartendernan, esnan encarga cu housekeeping, chefnan, taxistanan, tourguide y otronan ta transforma tareanan comun den experiencianan extraordinario. Nan ta e heroenan anonimo di nos industria y transformacion sostenibel mester cuminsa door di balora nos heroenan."

Minister Cicilia a enfatisa cu e agenda di turismo sostenibel di Aruba ta basa riba tres pilar fundamental: Supervision ambiental; salvaguardia e beachnan, rifnan y recursonan natural di Aruba.



Inclusion social; garantiza oportunidadnan husto y condicionnan digno pa tur trahado den e sector turistico.

Resiliencia economico; enfoca riba turismo impulsa pa balor door di atrae e bishitantenan di calidad y fomenta innovacion.

Mas aleu el a enfatisa cu sostenibilidad no ta solamente tocante responsabilidad ambiental pero tambe tocante proteha e medianan di subsistencia y garantiza cu e beneficiarionan di turismo ta comparti den henter

comunidad.

Organisa pa Aruba Tourism Authority, e conferencia a conta cu presentacionnan principal, panel discusion, sesion di networking, reafirmando e compromiso di Aruba cu un acercamento colectivo den construcion di un futuro sostenibel pa turismo.

Minister Cicilia a termina su discurso bisando:

"Turismo ta e curason di nos economia, e wes'i lomba di turismo ta nos hendenan. E curason ta provee vitalidad y prosperidad, pero e wes'i lomba ta provee estabilidad. Ta nos hendenan ta esnan cu ta garantiza e éxito di nos modelo turistico."